

224

418

8

準  
貴



題山先生詩集卷四

七言古詩

良飲行

丙子夏五月舟南澳

廣成

舟石石上車蹤一尺

洽何

唯飲黃酒能醉於及

詩

此物非不愛城下一

主神

物勿謂其小也

詩

此物非不愛城下一

將有一乃知此物非不愛城下一





遺山先生詩集卷第四

七言古詩

虞坂行

丙子夏五月將南渡河  
道出虞坂有感而作

虞坂盤盤上青石石上車蹤深一尺當時騏驎知  
奈何千古英雄淚橫臆龍蟠於泥易所嘆麟非其  
時聖為泣玄龜竟墮余且網老鳳常饑竹芝實天  
生神物似有意驗以乖逢知未必若論美好是不  
祥正使不逢何足惜孫陽騏驎不竝世百萬億中  
時有一乃知此物非不逢轅下一鳴人已識我行





道山詩集  
坂路多閱馬敢謂群空如冀北孫陽已矣誰汝知  
努力鹽車莫稱屈

畫馬爲邢將軍賦

大宛城下戰骨滿駑駘入漢龍種藏將軍此紙何  
處得便覺房駟無光芒人中馬中兩勅敵天門鴈  
門皆戰場并州父老應相望早晚旌旗上太行

秋蠶

室人篋中無寸縷一箔秋蠶課諸女朝來飼却上  
馬桑隔簇仍聞竹間雨阿容阿璋墨滿面畫徹灰

城前致語上無蒼蠅下無鼠作繭直須如甕許東  
家追胥守機杼有桑有稅吾猶汝官家却少一絢  
絲未到打門先自舉

南溪

南溪酒熟清而醇北溪梅花發興新前年去年花  
下醉今年冷落花應嗔梅花娟娟如靜女寂寞甘  
與荒山隣詩人愛花山亦好幽林穹谷生陽春風  
鬢峩峩一尺雲芳香幽臥如相親山堂夜半北風  
惡一點相思愁殺人



送郝講師任崇福宮

郝平  
晉人

大方之家幾知津郝君七十老斲輪書文五車喙  
三尺劇談混沌今猶神太玄博士爲絕倒君言誇  
矣天公嗔長安冠蓋羅青雲洛陽車馬爭紅塵怪  
君掉頭不肯住寂寞來作絲東隣崧高維岳古所  
秩三十六帝有外臣玄都石壇待臙馭宮殿突兀  
松輪困上界仙人鄧雲山洞天治所名司真蓬萊  
方丈去不遠明星玉女時相親瑤華可傾蘭可紉  
煙霞永隔塵中人黃鶴一去不復返白鷗萬里誰

能馴爲我殷勤謝鄧君玉華歲晚當平分

范寬秦川圖

張伯玉歿後同  
麻徵君知幾賦

亂山如馬爭欲前細路起伏蛇蜿蜒秦川之圖范  
寬筆來從米家書畫船變化開闔天機全濃澹覆  
露清而妍雲興霞蔚幾千里看我如在峩嶺巔西  
山盤盤天與連九點盡得齊州煙浮雲未清白日  
晚矯首四顧心茫然全秦天地一大物雷雨瀕洞  
龍頭軒因山分勢合水力眼底廓廓無齊燕我知  
寬也不辦此渠寧有筆如修椽紫髯落落西溪君



長劍倚天冠切雲望之見之不可親元龍未除湖  
 海氛李白豈是蓬蒿人愛君恨不識君早乃今得  
 子胸中秦作詩一笑君應聞予七年前過鄆城伯  
 玉知予來而都無賓  
 主意予亦偃蹇而去爾後雖願交而髯歿矣未嘗  
 不以爲恨也今日子思兄弟出此圖求予賦詩酒  
 惡無聊中俛爲賦此画本米元章家物有韓子蒼  
 題名元章以爲中立而元暉以爲中正以予觀之  
 此時張髯胸中物耳知  
 者當不以吾言爲過云

赤壁圖

馬蹄一蹴荆門空鼓聲怒與江流東曹瞞老去不  
 解事誤認孫郎作阿琮孫郎矯矯人中龍顧盼叱

咤生雲風疾雷破山出大火旗幟北捲天爲紅至  
 今圖畫見赤壁髣髴燒虜畱餘蹤令人長憶眉山  
 公載酒夜俯馮夷宮事殊興極憂思集天澹雲閒  
 今古同得意江山在眼中凡今誰是出群雄可憐  
 當日周公瑾顛顛黃州一禿翁

寄荅溪南詩老辛愿敬之

五年不喚溪南渡日夕心馳洛西路山中今日見  
 君詩惆悵良辰又相悞龍蛇大澤變風景虎豹天  
 門鬱煙霧丈夫不合把鉏犁青鬢無情忽衰素平



泉漫作窮愁志笠澤休題自憐賦長安正有五侯  
鯖駝麟誰能作樓護青燈老屋深蓬蒿蝙蝠掠面  
莎鷄號劍歌夜半激悲壯松風萬壑翻雲濤區區  
墓上曹征西我知嬾媿王東臯人生只有一杯酒  
螟蛉螺贏安能豪

西園

興定庚辰  
八月中作

西園老樹搖清秋畫船載酒芳華遊登山臨水祛  
煩憂物色無端生暮愁百年此地旃車發易水迢  
迢鴈行沒梁門回望繡成堆滿面黃沙哭燕月熒

熒一炬殊可憐膏血再變爲灰燼富貴已經春夢  
後典刑猶見靖康前當時三山初奏功三山宮闕  
雲錦重壁月瓊枝春色裏畫欄桂樹雨聲中秋山  
秋水今猶管漠漠荒煙送斜日銅人攜出露繁來  
人生無情淚沾臆麗川亭上看年芳更爲清歌盡  
此觴千古是非同一笑不須作賦擬阿房

愚軒爲趙宜之賦

心生心化誰搏控舉世偃偃皆大夢百年只辨作  
朝三爭識羣狙先汝弄人人具此清淨眼妄翳無



根嗟白種天機嗜欲涇渭雜道念紛華鄒魯闕令人却羨愚軒愚一蹴藩籬開廓空愚軒虛室久生白掌上精真元自洞氣徒神火俱長物豈有古方傳魯宋人言此眼本無負死恨冥行人所共智愚何預阿睹中或者桔槔賢抱瓮病瘖能指跛能履眉睫雖存寧復動我云俗士蔽一曲全笑不全從古衆渠儂六鑿日相攘內不錙銖徒外重守宮緣壁夸覆射懸虱如輪規命中天和一洩不知止膏火自焚良可痛從教目比方相多纔與瞽師論伯

仲先生真是有道者老境一愚聊自送五官止廢而神行就令有眼將無用寄謝諸方五味禪葛藤莫作金鑑頌

雙峰競秀圖爲參政楊侍郎賦

紅煙霏霏雲拂石山木蕭蕭山鬼泣江岸人家失南北兩峰突兀何許來元氣淋漓洗秋碧畫家晴景費經營其愛移山入杳冥安得北風吹雨去倚天長劍看崢嶸

西牕



西牕鳥聲千種好樹陰離離動微風青山滿前掩  
書坐欲話懷抱無人同花枝不笑綠鬢改尊酒自  
與黃金空少年樂事總消歇落日澹澹天無窮

二月十五日鶴

九龍岡上玄元祠人言尊像神所遺年年二月降  
靈鶴來無定數有定期城頭曉露生新警萬首望  
穿雲際影不知濁世誰下臨只許霜毛見脩整石  
壇花落松風冷戛然長鳴人語定百年鰥老誇見  
聞萬里黃冠赴靈應只從游騎突重圍城郭併與  
人民非可憐侈殿荒墟裏無復當年丁令威

聞欽叔在華下

翰林僊人詩酒豪平生嵇阮參遊遨山中草棘滿  
霜雪可惜渠家宮錦袍聞君忍飢讀離騷思之不  
見心爲勞舉頭西望忽大笑太華落落長庚高

閻商卿還山中

阿卿去月從我來今日西山成獨往野人不是城  
中物澗飲巖棲夢餘想翰林溼薪爆竹聲待詔履  
穿沾雪行蘭臺從事更閒吟文書如山白髮生孤



燈靜照寒牕宿北風夜半歌黃鵠田家閉門風雪  
深梅花開時酒應熟半世虛名不療貧棲遲零落  
百酸辛憑君莫向山中說白石清泉笑殺人

女儿山避兵送李長源歸關中

山骨稜稜雪花白北風不貸單衣客與君此別欲  
何言若箇男兒不湮阨相濡相响尚可活轢釜何  
曾厭求索從知鮫鱷無隱鱗芥視三山需一擘自  
古飢腸出奇策漢廷諸公必動色見君軒蓋長安  
陌

雪後招隣舍王贊子襄飲

去年春旱百日強小麥半熟雨作霜青山無情不  
畱客單衣北風官路長遺山山人伎倆拙食貧口  
衆畱他鄉五車載書不堪煮兩都覓官自取忙無  
端學術與時背如瞽失相徒俵俵今年得田昆水  
陽積年勞苦似欲償隣墻有竹山更好下田宜秫  
稻亦良已開長溝掩烏芋稍學老圃分紅薑宋公  
能詩雅好客勸我移家來水傍一間入手豈易得  
夢中我馬猶玄黃君不見并州少年作軒昂鷄鳴



起舞望八荒夜如何其夜未央賣刀買犢未厭早  
腰金騎鶴非所望河南冬來已三白土膏墳起如  
蜂房崧山東頭玉旆出父老知是豐年祥南溪酒  
熟梅花香高聲高喚墻東王便當過我取一醉聽  
歌長安金鳳凰

鄰舍宋可字予之隱君子也并州少年謂李汾長源長安金鳳凰者

齊梁間田舍兒所歌

半山亭招仲梁飲

孤城鬱鬱山四周外人乍到如纍囚半山亭前浙  
江水只可與君消百憂江山百年有此客雲樹六

月生涼秋世上紅塵爭白日一丘一壑去來休

鄧州城樓

鄧州城下湍水流鄧州城隅多古丘隆中布衣不  
復見浮雲西北空悠悠長鯨駕空海波立老鶴叫  
月蒼煙愁自古江山感游子今人誰解賦登樓

宛丘歎

秦陽陂頭人遼絕荻花茫茫白於雪當年萬家河  
朔來盡出牛頭入租帖蒼髯長官錯科事下考大  
笑陽城拙至今三老背腫青死爲逋懸出膏血君



不見劉君宰葉海內稱飢摩寒拊哀孤惇碑前千  
人萬人泣父老夢見如平生冰霜統絳渠有策如  
我碌碌當何成荒田滿眼人得耕詔書已復三年  
征早晚林間見鷄犬一犁春雨麥青青髯李令南陽配流民  
以牛頭租迫而逃者餘萬家劉雲卿御史宰葉除  
逃戶稅三萬斛百姓爲之立碑頌德賢不肖用心  
相遠如此李之後十年予爲此縣大爲逋懸所困  
辛卯七月農司檄予按秦陽陂田感而賦詩李與  
劉皆家宛丘故  
以宛丘歎命篇

游黃華山

黃華水簾天下絕我初聞之雪溪翁丹霞翠壁高

歡宮銀河下濯青芙蓉昨朝一遊亦偶爾更覺摹  
寫難爲功是時氣節已三月山木赤立無春容湍  
聲洶洶轉絕壑雪氣凜凜隨陰風懸流千丈忽當  
眼芥蒂一洗平生胸雷公怒擊散飛電日脚倒射  
垂長虹驪珠百斛供一瀉海藏翻倒愁龍公輕明  
圓轉不相礙變見融結誰爲雄歸來心魄爲動蕩  
曉夢月落春山空手中仙人九節杖每恨勝景不  
得窮攜壺重來岩下宿道人已約山櫻紅

巨然松吟萬壑圖



胸中刺鯁無九澤畫裏風煙纔一漚阿師定有維  
摩手斷取江山著筆頭石林蒼蒼崖寺古銀河浩  
浩松聲秋方外賞音誰具眼莫將輕比李營丘

密公寶章小集

天東長白大寶幢天河發源導三江有木蔽映山  
朝陽云誰巢者雛鳳凰雲間吐氣日五色百鳥不  
敢言文章名都盤盤魏大梁黃金甲第羅康莊王  
家書絕畫亦絕欲與中祕論低昂密公書院無絲  
簧聰明几潔凝幽香元光以後門鑰廢文士稍得

連壺觴客來喜色浮清揚典衣置酒餘空箱生平  
俊氣不易降眼中俗物都茫茫淵明素琴嵇阮酒  
妙意所寄誰能量在昔武元握乾綱扶桑爲弓射

八荒獵取一作大國如驅羊民風朴魯資鷲疆文

洽未及武剋剛興陵之孫越王子天以人瑞埽明  
昌十三執經侍帝傍十八健筆陵阿房撐腸文字  
五千卷靈臺架構森鋪張高陽苗裔襲衆芳胡不  
置之貢玉堂袖中正有活國手地下纔得修文郎  
悲風蕭蕭吹白楊丘山零落可憐傷承平故態耿



猶在拂拭寶墨生輝光恰似如菴連榻坐一甌春

露澹相忘

明昌寶玩群玉中祕內府圖書印也越邱有柳公權紫絲鞋歐率更海上楊凝

式乞花等帖然獨推元章華隨為古今絕筆宋畫譜山水以李成為第一國朝張太師浩然王內翰子端奉旨品第書畫謂成筆意繁碎有画史氣象次之荆關范許之下密公識賞超詣亦以此論為公郭乾暉雀棘公以為當在太古無上唐以來諸人筆虛筆實皆非其比故子詩及之樛軒公自號也又所居有如菴詩集號如菴小藁越王諸子唯樛軒貧甚典衣沽酒之句蓋實錄云甲午三月二十有一日為輔之書于聊城至覺寺之寓居

荆棘中杏花

墻東荒蹊抱村斜荆棘狼籍盤根芽何年丹杏此

畱種小紅澱澱爭春華野人慣見謾不省獨有詩  
客來咨嗟天真不到鉛粉筆富豔自是宮闈花曲  
池芳逕非宿咎蒼苔濁酒同天涯京師惜花如惜  
玉曉檐賣徹東西家杏花看紅不看白十日忙殺  
遊春車誰家園亭有此樹鄭重已著重幃遮阿嬌  
新寵貯金屋明妃遠嫁愁清笳落花縈簾拂床席  
亦有飄泊沾泥沙天公無心物自物得意未用相  
陵誇黃昏人啼花不語唯有落月啼栖鴉

太白獨酌圖

宣和所藏李伯時筆



謫仙去世三百年海中鯨魚渺翩翩豈知龍眠天  
馬筆忽有玉樹秋風前金鑿歸來身散仙世事悠  
悠白髮邊會稽賀老何處在千里名山入酒船清  
景已隨詩句盡風流合向畫圖傳往時長安酒家  
眠焦遂不狂張不顛想得三更風露下醉和江月  
弄江煙

松上幽人圖

宋宗婦曹夫人仲偕所  
畫上有曹道冲題詩

秋風謾謾松樹枝仙人骨輕雲一絲不飲不食玉  
雪姿竹宮月夕頻望祠竟不下視齋房芝人間女

手乃得之眼中擾擾昨暮見畫圖獨在羲皇時予  
懷渺兮幽林思

送張君美往南中

南朝辭臣北朝客棲遲零落無顏色陽平城邊握  
君手不侶銅駝洛陽陌去年春風吹鴈迴今年鴈  
逐秋風來春風秋風鴈聲裏行人日暮心悠哉長  
江大浪金山下吳兒舟船疾於馬西湖十月賞風  
煙想得新詩更瀟灑

戲題新居二十韻



去冬作舍誰資助縣侯雅以平原故賢郎檢視日  
復日規制從頭盡牢固南風一夕怪事發突兀赭  
垣殘半柱乞漿得酒遇初望曲突徙薪忘後慮長  
淮千里燕巢林明月一枝烏遶樹東家老屋西北  
走衆木枝撐畱少住繇來馬隊非講肆况與蕪牢  
通過路聚廬託處何暇擇重爲主人推獎悞夏秋  
之交十日陰抱被倚門愁旦暮問君新居在何許  
只去火餘纔數步學宮分地與開冷使館有牆遮  
雜汗就中此宅尤廢手官給工材半傭催十寒一

暴半載彊纔得安床置鑷釜紛紛暗被兒女笑老  
虎般彪今幾度胸中廣廈千萬間天地一身無著  
處北來衣冠日枯槁十九桃符傍門戶乾坤血肉  
得此身剩有把茅能勿纓上方下比良易見好惡  
且當隨所遇仰看片瓦聊自賀疾過巖墻寧反顧  
合歡明日召諸隣狼籍盃盤從飽吐

贈蕭鍊師公弼

吾家阿京愛公弼吾家澤兄敬公弼半生夢與公  
弼游豈意相逢在今日春風和氣見眉宇玉壺冰



鑑藏胸臆人間萬事君自知未必君材人盡識蘇  
門水木無纖埃聞君家近公和臺仙家近日多官  
府黃帽青鞋歸去來

時汰佛老家  
甚急故云

送弋唐佐董彥寬南歸

且為潞府  
諸公一笑

河汾續經名自重附會人嫌迫周孔史臣補傳久  
已出浮議至今猶洶洶薛收文志誰所傳貴甚竹  
書開汲冢沁州破後石故在為礎為砥吾亦恐暑  
涂十日來一觀面色為鰲足為腫淡公淡癖何所  
笑但笑弋卿堅又勇自言浪走固無益遠勝閉門

親細冗摩挲石刻喜不勝忘却崎嶇在岡隴潞人  
本淡新有社淡事重重非一種有人六月訪琴材  
不為畱難仍從吏懸知蠟本入渠手四座色揚神  
為竦他時記籍社中人流外更須增一董

蕭仲植長史齋

脩武作

張顛飲豪傾四座脫帽狂呼誰敢和南宗北宗知  
幾人醉眼紛紛飛鳥過是公技進不名技元氣淋  
漓隨咳唾偶然捉筆本無意自有龍騫并虎臥當  
時誰有戰國策

長史帖云借戰國  
策可付之凡七字

門外雷車忽驚



墮天星無數不知名色正芒寒纔七箇蕭郎家世  
陵谷後爭信空囊蓄奇貨蕭齋故事今復舉未怕  
秋風吹瓦破護持有物世其喜不獨一時爲子賀  
藏舟夜壑未厭深隄備有人來倚抱

送宋省參并寄潞府諸人

茅齋團團蝸殼大苦被傍人嘲塞破官家眼孔十  
萬緡未與書生供一唾長衫只辦包瘦骨故紙何  
緣變奇貨不因三致大耳兒老雪屯門甘凍臥國  
中腐鼠凡幾嚇玉上青蠅非一箇荆人美璞則足  
招君足幸存仍可賀雲間太行青在眼上客歸來  
傾四座因君寄問社中人前日淡公行復過

覓神霄道士古銅爵

雷章著土紛朱碧秋茵春蒲人不識若非儀狄墓  
中來應自杜康祠下得古人我得酒之傳摸索飲  
器流饑涎巧偷豪奪吾何敢他日酬君九府錢

賦澤人郭唐臣所藏山谷洮石研

研有銘云  
王將軍爲

國聞臨洮有司歲餽可會者六百鉅萬其  
於中國得用者此研材也研作璧水樣

舊聞鸚鵡曾化石不數鷓鴣能瑩刀縣官歲費六



百萬纔得此研來臨洮玄雲膚寸天下徧壁水直  
上文星高辭翰今誰江夏筆三錢無用試鷄毛

贈休糧張鍊師

金砂霧散風雨疾一點黃金擣秋橘中林宴坐人  
不知麝鹿銜花蜂課蜜富兒盤饌羅羶葷擾擾飛  
蠅復聚蚊見說西山好薇蕨一枝青竹願隨君

天井關

石磴盤盤積如鐵牛領成創馬蹄穴老天與世不  
相關玄聖栖栖此迴轍二十年前走大梁當時塵

土困名場山頭千尺枯松樹又見單衣下太行自  
笑道塗頭白了依然直北有羊腸

讀書山雪中

前年望歸歸不得去年中途脚無力殘生何意有  
今年突兀家山墮眼前東家西家百壺酒主人捧  
觴客長壽先生醉袖挽春迴萬落千村滿花柳山  
靈爲渠也放顛世界幻入兜羅綿似嫌衣錦太寒  
乞別作玉屑妝山川人言少微照鄉井准備黃雲  
三萬頃何人辨作陳瑩中來與先生共炊餅

陳先生  
先



官後荅京師人書云南州有何事今年好雪明年炊餅大耳

題商孟卿家明皇合曲圖

海棠一株春一國燕燕鶯鶯作寒食千古萬古開  
元日三郎搦管仰面吹天公大笑嗔不得寧王天  
人玉不如番綽樂句不可無宮腰不按羽衣譜疾  
舞底用牧豬奴風聲水聲闕清都夢中令人羨華  
胥何時却竝宮牆聽恨不將身作李暮

過晉陽故城書事

惠遠祠前晉溪水翠葉銀花清見底水上西山如

臥屏鬱鬱蒼蒼三百里中原北門形勢雄想見城  
闕雲煙中望川亭上閱今古但有麥浪搖春風君  
不見繫舟山頭龍角禿白塔一摧城覆沒薛王出  
降民不降屋瓦亂飛如箭簇汾流決入大夏門府  
治移著唐明村只從巨屏失光彩河洛幾度風煙  
昏東闕蒼龍西玉虎金雀觚稜上雲雨不論民居  
與官府仙佛所廬餘百所鬼役天財千萬古爭教  
一炬成焦土至今父老哭向天死恨河南往來苦  
南人鬼巫好禳祥萬夫畚鍤開連岡官街十字改



丁字釘破并州渠亦亡幾時却到承平了重看官  
家築晉陽

遺山先生詩集卷第四 終

遺山先生詩集卷第五

七言古詩

蟾池

老蟄食月飽復吐天公一目頻年瞽下界新增養  
蟾戶玉斧誰憐修月苦郡國蟾池知幾所碧玉清  
流水仙府小蟾徐行腹如鼓大蟾張頤怒於虎渠  
家眉間有黃乳膏梁大丁正須汝何人敢與月復  
讐疾過池頭不容語向來屬私今屬官從今見蟄  
當好看爬沙卽上青雲端



贈荅張教授仲文

秋燈搖搖風拂席夜聞歎聲無處覓疑作金荃怨  
曲蘭畹辭元是寒蟄月中泣世間刺繡多絕巧石  
竹殷紅土花碧竊愁入骨死不銷誰與渠儂洗寒  
乞東坡胸次丹青國天孫縲絲天女織倒鳳顛鸞  
金粟尺裁斷瓊綃三萬疋辛郎偷發金錦箱飛浸  
海東星斗溼醉中握手一長嗟樂府數來今幾家  
剗借春風染華髮筆頭畱看五雲花

言韋郎有此例  
長吉亦有此例

七言長詩於  
中獨一句九

高門關

高門關頭霜樹老細路千山萬山遶亂餘村落不  
見人霰雪霏霏暗清曉莘川百里如掌平閒田滿  
眼人得耕山中樹藝亦不惡誰遣多田知姓名許  
李申楊竟何得只今惟有石灘聲

許致忠楊湯臣  
申伯勝李仲常

名宦四家隱盧氏時以多田  
推之亂後俱不知所在矣

甲辰秋洛陽得黃葵子種之南菴明年夏六  
月作花佛經所謂閻浮檀金明淨柔軟令  
人愛樂者此花可以當之因爲賦長韻子



方以病止酒故卒章及之

芳蕤浥露嬌黃溼五疊湘君輕褰積晨吹午醉一  
日閒白白紅紅總狼籍上陽宮女要頭冠摹寫雖  
工破的難看來明淨復柔軟花中乃有閻浮檀千  
里移根洛陽陌主人不飲誰看客乞與金杯自傾  
側明年爲渠當舉白

馬嶺

仙人臺高鶴飛度錦繡堂傾去無路人言馬嶺差  
可行比似黃榆猶坦步石門木落風颼颼僕夫衣

單望南州星落東南三百里鬢毛衰颯兩年秋

子去

歲往河南遷奉  
亦取黃榆嶺路

雲峽 并序

君璋啟事西涼占對稱二日其還也行臺  
公以宣和寶石爲貺奇秀溫潤信天壤間  
之尤物君璋目之曰雲峽邀詞客賦詩予  
亦同作

石盆清冷貯秋水水面蒼煙飛不起一堆寒碧几  
研間寶氣崢嶸插箕尾中山雪浪空影像長安鸚



鷓猶紈綺枉著奇章甲乙中槁項纔堪把耕耒不  
 知天壤此尤物鬼刻神劖通有幾薰蒸似欲出泉  
 脈瑩滑定應凝石髓剝裂雯華漬月秋辛苦詩仙  
 費模擬車箱箭筈連西東仇池百穴牕玲瓏飛墮  
 不嫌靈鷲小奇探已覺太湖空故都喬木今如此  
 夢想熙春百花裏膏血綱船枯九州亡國愁顏爲  
 誰洗主人天質粹以溫天然與山作知聞退食從  
 容北牕臥今古起滅眞浮雲

仙人王子可賦石淙  
有石裂雯華漬月秋

雲巖并序

觀州倅武伯英崞縣人少日舉進士有詩  
 名其賦剪燭刀有啼殘瘦玉蘭心吐蹴落  
 春紅燕尾香之句甚爲時輩所稱家故饒  
 財第宅園亭爲河東之冠貯書有萬卷樓  
 嘉花珍果悉自他州移植爲人多伎巧山  
 水雜畫斲琴和墨皆極其工嘗得宣和湖  
 石一窾窳穿漏殆若神劖鬼鑿炷香其下  
 則煙氣四起散布槃水上濃淡霏拂有煙



江疊嶂之韻吾鄉衣冠家法書名畫及藏書之多亦有伯英相上下者伯英獨特寶石以擅奇汾晉間耳興定求伯英沒於關中楊戶部叔玉購石得之壬辰圍城中以示予且命作詩危急存亡之際不暇及也乙巳冬十一月來東平過聖與張君之新軒而此石在焉聖與名之曰雲巖予問石所從來聖與言夏津王帥得之沐梁泥塗中而以見貽予因歎一物之微經歷世變

遷徙南北乃復爲好事者之所寶玩似不偶然乃爲詩道其故聖與三世相家以文章名海內其才情風調不減前世賀東山晏叔原故卒章以蕭閒明秀峰故事屬之壺中九華玉孱顏紫煙著水往復還小牕虛明淡相對不數漢宮銅博山會稽禹穴深無底寶石偷來定山鬼一堆寒碧殊不凡滿谷春雲更堪喜阿欣秀發見眉宇小杜才情淪骨髓摩挲不作几上看繚白紵青便千里渾沌日鑿餘空嵌漏天蒸溼



饒風嵐世外元無種香國海南真有補  
隨巖觀州受翫頻滿被民部平生幾薰沐  
藏舟夜壑未厭深竟作新軒坐中物  
一天星月入金尊翠射娉婷自有人  
只欠宣和鄭先覺爲君畱寫五湖真

劉遠筆

老斲力能舉玉杵文陣挽強猶百鈞  
惜哉變化太狡獪嚮也褐衣今虎文  
宣城諸葛寂無聞前後兩劉新冊勲  
謝郎神風恨太雋雖然豈不超人羣  
三錢鷄毛吐皇墳尖奴定能張吾軍  
何時酌我百壺

酒爲汝醉草垂天雲

狡獪變化事見麻姑傳

贈周良老

于公斷獄多平反高門大車在乃孫  
我居聊城欲二載喜見周叟醇而溫  
十年大理書上考宜有陽報如于門  
大兒書來問安否兵饑不死天所存  
鄭孫毛骨殊秀發寶氣鬱鬱含朝暎  
機聲嘔啞聒朝昏種瓠五石當酒尊  
是翁福祿知未艾兄弟和樂連株根  
白髮阿兄應念我南雲寂寞賦招魂

鴻溝全欽叔賦



劉郎著手乾坤了未害與渠分九州夸兒衣繡自  
楚楚作計豈復西鴻溝雌雄自決已無策尺寸必  
爭唯上流韓生已死言猶在千載令人笑沐猴

雪中自洛陽還嵩山

道人薄有塵外緣迫入塵埃私自憐三十六峯一  
茅屋夢裏西家掠社錢津津喜色見眉宇峩峩青  
城當眼前蹇驢運入風煙去恰是梅花欲雪天

祖唐臣愚菴

小智胥篋盜所羞大智移國鬼與雙浮生匹絹兩

孟粥心計擾擾知何求青州荊州兔三窟古人今  
人貉一丘喚起羅池柳夫子與君同醉訾家洲

過井陘

北山亭亭如驛堠南山耽耽虎翹首上門東頭望  
井陘漢家風雲自奔走市人豈識英雄材金鼓一  
朝天上來此山行人萬萬古幾不磨滅隨蒿萊白  
鹿祠前一杯水蒼顏聊爲洗塵埃

北嶽

太茂維嶽古帝孫太朴未散真巧存乾坤自有靈



境在地位豈合他山尊中原旌旗白日暗上階樓  
觀蒼煙屯誰能借我兩黃鵠長袖一拂玄都門

天涯山

九州上游推大鹵獨恨山形頗椎魯天涯一峰今  
日看快似昂頭出環堵何年氣母此融結鬼鑿神  
劉未奇古八牕玲瓏透朝日洞穴慘澹藏雷雨苔  
花錦石粲可喜乞與雲煙相媚嫵半空擲下金芙蓉  
藁想得飛來自玄圃傳聞絕頂更靈異云是清都  
群玉府五雲飛步吾未能風袂泠泠已輕舉東州

死愛華不注向在陋邦何足數敬亭不著謝宣城  
斷岸何緣比天姥酒船何時朝復暮倒卷滹沱浣  
塵土喚起山靈搥石鼓漢女湘妃出歌舞詩狂他  
日笑遺山飯顆不妨嘲杜甫

山有石  
鼓神祠

智仲可月下彈琴圖

暮春舞雩鼓瑟希琴語解吐胸中奇誰言手揮七  
絃易大笑虎頭真絕癡北風蕭蕭路何永流波湯  
湯君自知三尺絲桐儘堪老兒童休訝鶴書遲

常山妖生四十月能搦管作字筆意開廓有



成人之量喜爲賦詩使洛誦之

大兒小兒舞商羊東家西家捉迷藏牙牙作群鴈  
鴈行是中乃有常山郎常山矯矯可憐蟲四歲未  
有三歲強黑鷹破殼自神駿黃犢放脚須跳梁只  
知見紙卽塗抹誰謂轉腕能低昂渠家兩翁破天  
荒劉輝夢靈果專場榮鄉亭中詩版在岐山名字  
香山香此郎晚出西樞房虎穴虎子不可當天驚  
地怪見落筆便合抱送中書堂文星煌煌照燕南  
青青子衿滿恒陽教官連被鳳尾諾瑞物多生金

粟岡兒曹變化不作難何必二十始乖張明年作

字一丈大當有稜角坐光芒回頭却看元叔綱鼻

涕過口尺許長

常山白寓齋第三子  
叔綱遺山之季子也

贈利州侯神童

生十四月識字予見時  
生二十一月識字無算

牙牙點妝杏蕾紅阿兄抱之來學宮今春學語語  
未正已能見書識名姓隨指隨讀無數重多生想  
曾文字中極知之無不足訝更恐洛誦難爲功土  
中松粒龍爪脫萬牛丘山起毫末君不見黃金寶  
鼎翡翠青未要春官許衣鉢人間失却麻神童明



星煌煌出蒼龍只知江陵圖籀畫一火誰謂死草  
生華風遺山老子未老在見汝吐焰如長虹

兒字金鼎

奚官牧馬圖息軒畫

曹韓畫樣出中祕燕市死骨空千金息軒筆底真  
龍出凡馬一空無古今安閒自與人意熟蕭灑更  
覺天機深奚官有知應解笑世無坡仙誰賞音

紫微劉丈山水爲濟川賦

畫家李范真勅敵方外只今誰第一自非劉宗祭  
酒阜昌孫未信仙翁輕落筆長洲遠浦各清冷萬

頃風煙一草亭千章古木散巖谷鶴髮松姿餘典  
刑紙尾不須題姓字人人知是老人星

王右丞雪霽捕魚圖

江雲滉滉陰晴半沙雪離離點江岸畫中不信有  
天機細向樹林枯處看漁浦移家媿未能扁舟蕭  
散亦何曾白頭歲月黃塵底笑殺高人王右丞

跋酒門限邵和卿醉婦圖

邵伯祿之父

邵公頭白甫三十高吟大醉無虛日風流畧似靖  
南湖每恨聞名不相識太平村落自繇身童稚扶



攜意更真醉歸圖上見顏色喜溢睂宇猶津津好  
著蹇驢馱我去與君同醉杏園春

題張彥寶陵川西溪圖

松林蕭蕭映靈宇爍石流金不知暑太平散人江  
表來自訝清涼造仙府不到西溪四十年溪光林  
影想依然當時膝上王文度五字詩成衆口傳忽

見畫圖疑是夢而今塵土浣華顛

本送字今改作浣字陵川在太

行之巔蓋天壤間清涼境界也江淮太平散人題  
詩東廟自謂已造仙府恨居民不知其樂耳此縣  
先君子舊治宴游西溪僕以童子侍焉彥寶出此  
圖求賦詩感今懷管爲之愴然故篇中有及癸丑

十一月  
三日題

汝州倅韓君德華其十二世祖相遼封魯公

故名其伯男子曰魯王父命氏古蓋有之

予過其家命魯出拜謂予言魯名矣而未

有字敢以爲請予字之世公德華曰願終

教之乃申之以辭

昌黎諸韓散盧龍魯公相遼開邑封鴈行後先六  
侍中大參高文紀神功龜石穹窿與天終百年故  
家餘素風汝州有子今成童考古制名龜筮從貴



以道義飭汝躬良璞不治凡石同貞而絕俗孰子  
容濟質以文介而通顧雖宗起其起宗魯也不慚  
袁氏公

壬子冬至新軒張兄聖與求爲兒子阿平制  
名予名之曰琥以仲耽字之小字明復有  
善禱之義焉詩不工當令阿耽灑落誦之  
阿平玉雪絕可憐皎如鶴雛下青田呼來拜客挽  
不前啼聲如聞過秦篇陳王人門漢韋賢新軒文  
筆尤翩翩大弔挂壁誰使然我知一經會有傳玄

黻之冬客須城問平之年纔五齡廼公爲兒求制  
名兒名從虎玉與并仲耽爲字以字行佛書舊說  
無空青豈知空青今有形紫公紫公還我明看見  
著脚青雲平

世宗御書田不伐望月婆羅門引先得楚字  
韻

瑤光樓前按歌舞桂樹秋香月三五白頭誰解記  
開元四海歡聲自簫鼓兩都秋色皆喬木三月阿  
房已焦土天人亦有離別情可是田郎心獨苦承



平舊物霓裳譜寶氣暉暉映千古銀橋望極竟不  
歸滅沒燕鴻下平楚

送崔夢臣北上

并序

子貢抱關買臣負薪朝奏暮召名動縉紳  
此有志之士所以自奮於昌辰者耶夢臣  
崔卿玉樹清姿士門華胄成童授學與鷄  
俱興肆筆成書倚馬可待雖泌水之洋洋  
堪樂舜門之穆穆方開惜歲月之虛捐欲  
雲霄之坐致遇順風而縱大壑其孰禦之

登金馬而上玉堂在此行矣詩以勸駕序

寧闕乎癸丑二月望日新興元某序

并州書郎年少客細馬金鞭日三百生平意氣凌  
青雲未怕天山雪花白西園此日盛徐陳鳳閣鸞  
臺氣象新絲來草創資潤色况復天造須經綸他  
日南歸吾未老與君同醉晉溪春

送王彥華

中朝名勝龍山冀喜色門闌得佳壻一朝天府效  
驅馳萬里青雲在平地金粟岡頭俊造多莫從人



品問如何迂齋受學青衿日殷重遺山爲拊摩東  
國人倫吾豈敢只憑月旦決巍科

李成之王彥華趙孝先以提學命見餉佳酒  
且求制名取以詩記之

子雲寂寞將誰親延之麤豪意自真君家公壻兩  
冰玉酒味自合清而醇雲腴俗士無風神紅珠女  
兒茜裙新一杯香絕韻亦絕只今唯有醪醑春

劉時舉節制雲南

雲南山高去天尺漢家弦聲雷破壁九州之外更

九州海色澄清映南極幽并豪俠喜功名咄嗟顧  
盼風雲生今年肘後印如斗過眼已覺烏蠻平諭  
蜀相如今老矣不妨銅柱有新名

贈張潤之

許年不唱龍津第人物尤難到衰世明堂他日要  
梗楠造物也須論蚤計晉人稟賦例真淳兒能讀  
書知養親遺山門客富儒雅綠髮張郎名姓新莫  
道琴工有師法海山深絕解移人

潤之資甚美故就其可致者而

勉之他日學業有成老夫當以風鑒自負矣



許道寧寒溪古木圖

爲翟器之賦

道人醉袖蟠蛟龍埽出古木牙須雄開卷颯颯來  
陰風翟卿論畫凡馬空能知畫與詩同宗解衣盤  
礴非衆工遺山筆頭有關仝意匠已在風雲中畱  
待他日不恩恩

送張書記子益從嚴相北上

并序

子益省郎觀國之光從公于邁揚雄詞賦  
良借力於吹噓鄧禹功名木無心於祿仕  
詩以送別亦以趣其歸云

故家人物饒奇俊聳壑昂霄今已信康侯晝接拜  
寵光百里自應沾海潤六月貂裘風雪深天河天  
駟日駸駸莫把聲華動臺閣東方書檄要陳琳

贈別孫德謙

津橋垂楊雪花白挽斷春衫苦畱客西湖一雨春  
意濃絕似銅駝洛陽陌湖亭轟醉臥春風到手金  
杯不放空鵲山一帶傷心碧羨殺孫郎馬首東

汾亭古意圖

堯氏羲皇去未遠日作日息天機全杜侯袖裏姑



汾筆辦與南華談，窅然廢興知經幾。今符淳朴別

有一山川白雲亭，上秋風客不比仙翁甲子年。元祐

以來郭熙明昌泰和間張公佐皆年過八十而以山水擅名今雲中杜文莘老與張郭年相若而画品不下古人爲侯廣道作汾亭古橫披灑然有塵外意爲題四韻其後神仙張果生帝堯甲子年詩家亦傳習用之故末句有及

太原贈張彥遠

并州城邊十月末，清霜稜稜風入骨。因君夜話吳江春，酒光潑灑金杯滑。閒閒騎鯨去，滅沒當年愛君俊。於鵲平生我亦識，翁人惆悵流年如電抹。官

家新築文昌臺，蒼生不憂墮巔崖。限看東閣奇士滿，如君豈得藏蒿萊。晨鷄未鳴子當發，明星煌煌大於月。野夫一笑冠纓絕。

換得雲臺帖喜而賦詩

周官武臣奉朝請，劍佩束縛非天真。世間曾有華陀帖，神物已化延平津。米狂雄筆照萬古，北宗草書纔九人。今日雲臺見遺墨，黃金牢鎖玉麒麟。

鹿泉新居二十四韻

上門西邊井陘渡，野日荒荒下汀樹。榆關石嶺都



幾程客夢往往迷歸路塵埃風雨半生過儘著筋  
骸支世故寧州假館又兩年未係東來不西去山  
城百家家有山靚面呈山誰一顧賣書買得呂氏  
園不謂全山舉相付北崖老作土灰色擁腫形摸  
一夸父娟娟正有小峨眉却立不容親杖屨就中  
抱犢尤峭拔望見韓山卽攀附韓王砦頭四望闊  
全趙米如纜數聚眼中麾蓋天上來泝水鼓旗紛  
偃仆漢家威靈萬萬古石子連岡猶虎距夏秋衆  
壑會鹿泉浩浩湍聲瀉餘怒西南諸峰不知數蕩

海鯤鱷尻背露霏煙空翠有無中百態陰晴變朝  
暮靈巖龍泉曾一到獨欠封龍展衰步學仙不愛  
徐童花李相書龕心所慕生平懷抱向山盡老氣  
崔嵬如有助巖居枯寂朝市喧喧寂兩間差有趣  
得行固願畱不惡流坎且當隨所遇何曾萬錢何  
用許方丈有山容下箸管城初無食肉相黃帽非  
供折腰具明年高築野史亭天已安排看山處多  
慙不及謝宣城標出敬亭天一柱一本尚慙不及  
謝宣城標出敬  
亭天一柱在方丈  
有山容下筍之下



過劉子中新居

鄆州城隅兩茅屋市聲喧喧自幽獨春風吹盡山  
杏花只有青青一叢竹先生愛畫如惜玉練鵲翔  
鸞餘百軸大兒踉蹌挾書歸土銚疎煙纔一粥微  
官枉負半生閒也著區區簿領間何時却與溪南  
老紫蓋山前共往還

子中舊與溪南詩老  
辛敬之游故有上句

東湖次及之韻

西山山頭山月白倒影漣漪舞寒碧竹溪花鳥要  
君詩醉墨幾番枯研滴東湖佳處詩已盡矯首不

知川路隔當年韓賈伯物色分畱到佳客此州何  
必減蘇州頻有詩人來列職一時人境偶相值萬  
古風流餘此席三堂風月今猶管擬拂塵纓問投  
跡因君寄謝使君公却恐他年厭求索

贈郝萬戶

阿卿袖中五色筆弦聲裂石雷破壁繡衣千騎東  
方來俊氣崢嶸蜀山碧詩書義府無古今祭遵軍  
中亦歌吟密侯勲業君自識計算不數韓淮陰莫  
看仁柔待儒雅朱輪畫轂見天心

鄧禹封  
高密侯



王學士熊岳圖

洗參池水甜於密玉堂仙翁髮如漆膝前文度更  
風流盡卷風流入詩筆長松手種欲摩天海岳樓  
空落照邊古來說有遼東鶴仙語星星誰爲傳五  
百年間異人出却將錦繡裹山川

贈史子桓尋親之行

七十老親頭雪白滿意晨昏慰顏色兵塵瀕洞君  
不憂萬里天心不相隔八月秋霖九月霜破帽北  
風官路長瓜田故侯貧且病愛莫助之徒自傷後

日書來聞吉語通家猶得似南陽



遺山先生詩集卷第六

雜言

去歲君遠遊送仲梁出山

去歲君遠遊今年客他州青天萬古一明月只與  
行人生暮愁問君遊何許情多地僻兮徧處金鞭  
斷折騏驎死萬里長鴻思一舉憶初識子梁王臺  
清風入座無纖埃華嶽峯尖見秋隼金睛玉爪不  
凡材西園日晴花滿煙五雲樓閣三山巔玉樹瑤  
林照春色青錢白璧買芳年三年一夢南陽道汴



水迢迢入秋草拏雲心事人不知千首新詩怨枯  
槁破屋仰見星疎衾風露清匣中有長劍爲君鳴  
不平泥塗久辱思一濯去去舉足皆清冷鄧州大  
師材望雄愛客不減奇章公軍中宴酣笳鼓競銀  
燭吐焰如長虹幕中多士君又往談笑已覺南夷  
空東州春迴十月後梅花分香入春酒平生得意  
欽與京青眼高歌望君久浙江南下青云石門  
細路蒼烟屯五松平頭白日靜千山萬山如亂雲  
菊源不逐時事改芝嶺自與商顏鄰他日相思一

迴首漁舟時問武陵人

欽謂欽叔京卽京父也  
樂天書以徵之爲徵之

此日不足惜

此日不足惜此酒不可無頗怪昌黎公亦復爲世  
儒天生至神物與人作華胥一酌舌本彊二酌燥  
吻濡三酌動高興四酌色敷腴連綿五六酌枯腸  
潤如酥眼花耳熱後萬物寄一壺十酌未渠央百  
觚亦奚拘人生一世間忽若過隙駒有酒不解飲  
問君誰與娛君不見東家騎鯨李膽滿六尺軀萬  
言黃石策八陣夔州圖酒酣起舞不稱意長吁青



雲指夷吾又不見西家紫髯郎老氣雄萬夫狂歌  
飲燕市擊筑聲嗚嗚倚天長劔插少室頗欲四海  
皆東湖鷹揚虎視今焉如河山永隔黃公壚銜杯  
直待秋井塌青苔白骨憐君愚少年覓計生白須  
捫參歷井無危途榮不滿睫良區區就令一朝便  
得八州督爭似高吟大醉寤朝晡餘名安得潤枯  
骨四十豈不知頭顱此日不足惜此酒不可無太  
虛爲室月爲燭醉倒不用春風扶

送希顏赴召西臺兼簡李汾長源

昨日游崧丘今日西臺行勞生好夢亦大少枕中  
馬嘶車鐸鳴山林之樂無虧成胡爲解蘭縛塵纓  
蒼生望君須一起我知無地逃功名關中得君作  
金城氣象已覺西山平諸人誰出仲卿右一座想  
爲相如傾風華浩蕩春冥冥馬頭仙掌遙相迎長  
安市上見李白爲我一醉秦東亭

嵩山玉鏡

玉鏡見  
□□□何許今日東山隱積雨洗昏霾旭日發光  
輝光輝奪人目灑灑如動移初如秋月圓漸如曙



星微曙星未能久併與晨露晞此鏡何從來造化  
祕莫窺山精或寶氣恍惚令人疑誰爲問岳祇山  
川英秀會有歸不能生申與甫瑞王國萬丈光芒  
徒爾爲

虎害

北山虎有穴南山虎爲群目光如電聲如雷倚蕩  
起伏山之垠百人一飽不畱骨敗衣墜絮徒紛紛  
空谷絕樵聲長路無行塵呀呀垂涎口耽耽闕城  
闐天地豈不仁社公豈不神哀哀太山婦叫斷秋

空雲可憐封使君生不治民死食民世上無復裴  
將軍北平太守今何人

飲酒

江南秋泉雲液濃遼東抹利玉汁鎔柳瓢朝傾荔  
枝綠螺杯暮捲珍珠紅此酒誰所畱今日乃汝逢  
仙人一丸藥洗我芥蒂胸金沙一散風雨疾世事  
盡與浮雲空東家劉伯倫西家王無功醉鄉日月  
萬萬古眼中擾擾誰爲雄人會有歸盡飲不飲所  
同所恨獨醒人百年枯槁中獨醒恨未通獨醉恨



未公安得清江變醇醑盡迴天地入春風

送高信卿

高卿去歲山中居橡朝栗暮分猿狙今年移家入  
城市甌中生塵釜生魚文窟智亦窮五鬼更嘯呼  
迺翁延客著上座兩兒已復遭椰揄三冬兔園冊  
牧豎叫語麗溼薪煙滿眼破硯冰生須賣符與行  
藥不養堂堂軀無衣思南州千里走單車我嘗相  
夫君不是山澤臞十八學擊劍二十力陰符平生  
結交王與李袖中頗有魚麗圖文武志膽誰不如

不能拔劍斫蛟鱷亦當赤手降於菟胡爲堅坐守  
寒飢坐令兒女悲窮途禹事糊塗酒一壺別時聊  
爲鼓隴胡中原麟鳳今如此莫道皇家結網疎

寄趙宜之

趙時在  
盧氏

大城滿豺虎小城空雀鼠可憐河朔州人掘草根  
官煮弩北人南來向何處莫說莘川今樂土莘川  
三月春事忙布谷勸耕鳩喚雨舊聞抱犢山摩雲  
出蒼稜長林絕壑人迹所不到可以避世如武陵  
煮橡當果穀煎术甘飴餉此物足以度荒歲况有



麋鹿可射魚可罾自我來嵩前早乾歲相仍耕田  
食不足又復違親朋三年西去心籠禽念飛騰一  
瓶一鉢百無累恨我不如雲水僧崧山幾來層不  
畏登不得但畏不得登洛陽一夕秋風起義然吳□□□

中  
張季鷹

段志堅畫龍爲劉鄧州賦

豬龍可豢亦可屠世人畫蛇復畫魚天飛忽入阿  
堅筆始覺衆史欺庸愚腥風萬里來白浪橫江湖  
一麾走海若再顧失天吳浩蕩明河翻尾鬣慘不

濡只愁紙上出雷火搏控大千如此珠天生神物  
與化俱滅沒變見何所無逆鱗自古不受觸乃今  
縮頭隨卷舒怪得堂堂髯御史平生長有雨隨車

送詩人秦簡夫歸蘇墳別業

三月不見君渴心欲生塵論文一樽酒雅道誰當  
陳昨朝見君臨水句乃知抽青配白非詩人南山  
明月北山雲恨君不作繇東隣擊鮮爲具非無好  
事者天隨杞菊年年新石田茅屋連蘇墳兩兒力  
耕足養親君詩或者昌晚節不應道路長逡巡白



髮刁騷一幅巾豐年鄉社樂閒身蹇驢馳入醉鄉  
太袖中知有眉山春

紀子正杏園燕集

甲午歲

紀翁種杏城西垠千株萬株紅艷新今年寒食好  
天色曉氣鬱鬱含芳津天公自愛此花好朝薰暮  
染頰花神融霞暈雪一傾倒非煙非霧非卿雲未  
開何所似乳兒粉妝深絳唇能啼能笑癡復駭晝  
出百子元非真半開何所似里中處女東家鄰陽  
和入骨春思動欲語不語時輕輦就中爛熳尤更

好五家合隊號與秦曲江江頭看車馬十里羅綺  
爭紅塵陽平一邑多詩豪主人買酒邀衆賓花時  
此游有成約恨少楊子張吾軍落花著衣紅續紛  
四坐慘淡傷精魂花開花落十日耳對花不飲花  
應嗔愛花常苦得花晚爭教行樂無閒身芳苞一  
破不更合且看錦樹烘殘春

李參軍北上

五日過居庸十日渡桑乾受降城北幾千里出塞  
入塞沙漫漫古來丈夫淚不灑別離間今朝送君



行情深畱餘潛生女莫作王昭君一去紫臺空珮  
環生男莫作班定遠萬里馳書望玉關我知驥子  
墮地無齊燕我知鴻鵠意氣青雲端草間尺鷃亦  
自樂扶搖直上何勞搏一衣敝縕袍一飽苜蓿盤  
歲時壽翁媪團樂有餘歡就令一朝便得八州督  
爭似綵衣起舞春爛斑去年雒陽人今年指天山  
地遠馬羈破霜重貂裘寒朔風浩浩來客子慘在  
顏扼胡嶺上一迴首未必君心如石頑君不見桓  
山烏乳哺不得須臾間衆雛一朝散孤雌四顧聲  
悲酸寒鴈來時八九月白頭阿母望君還

王黃華墨竹

爲郭輔之賦

古來畫竹尊右丞東坡斂袂不敢評開元石本出  
摹寫燕市駿骨畱空名亦有文湖州畫意不畫形  
一爲坡所賞四海知有篔簹亭深衣幅巾老明經  
老死不敢言縱橫豈非遼江一派最後出運斤成  
風刃發劓雪溪仙人詩骨清畫筆尚餘詩典刑月  
中看竹寫秋影清鏡平明白髮生娟娟畧似萱草  
詠落落不減叢臺行千枝萬葉何許來但見醉帖



字欹傾君不見忠恕大篆草書法趙生怒虎喫墨  
成至人技進不名技遊戲亦復通真靈百年文章  
公主盟屏山見之蹠且擎聲光舊塞天壤破議論  
今著兒曹輕有物於此鳴不平悲耶嘯耶誰汝令  
只恐破窗風雨夜心隨雷電上青冥

泛舟大明湖

待杜子不至

長白山前繡江水展放荷花三十里看山水底山  
更佳一堆蒼烟收不起山從陽丘西來青一彎天  
公擲下半玉環大明湖上一杯酒昨日繡江看曉

間晚涼一櫂東城渡水暗荷深若無路江妃不惜  
水芝香狼籍秋風與秋露蘭襟鬱鬱散芳澤羅襪  
盈盈見微步晚晴一賦畫不成枉看風標誇白鷺  
我時驂鸞追散仙但見金支翠蕤相後先眼花耳  
熱不稱意高唱吳歌叩兩舷喚取樊川搖醉筆風  
流聊與付他年

九月七日夢中作詩續以末後二句

桃花紅深李花白昨日成團今日拆歌聲滿耳何  
處來楊柳青旗洛陽陌拊君背握君手朝鐘暮鼓



無了期世事於人竟何有  
青青鏡中髮忽忽成白  
首六國印何如負郭二頃田  
千載名不及卽時一杯酒

賦邢州鵲山

去時唐山道望望鵲山背  
今朝西北看奇秀益可愛  
蒼茫失層疊解駁見縈滯  
浮雲自來去盡巧寧變壞  
吳妝入小筆隱隱拂殘黛  
城隅靜女人不知擁髻  
佗顰如有待太行橫截九州半  
一掩一重俱有態只知天平六峯天下稀  
此山東來亦間在煙埋雨沒今幾時  
殆天所藏予發之郭熙未足語平遠  
摹寫誰有韋郎詩

送王亞夫舉家歸許昌

一日兩食藜藿葵三冬一褐  
𦞙與齊監河貸粟困欲死  
望望江水湔塵泥故書一束手  
自攜沐兒跳梁翠女啼出門疾走  
勿反顧正恐五鬼從之西馬中豈是無龍媒  
世人徒知牝牡黃與驪只如黃金絡頭亦不惡  
誰謂茅索能相羈天公醉著百不問汝偶而偶奇而奇  
前途兀兀黑於漆昨日把笏今



扶犁乃知世間倚伏不可料井底容有青雲梯春  
風兩淮多鼙鼓軍中少年舞荒鷄因君南望一大  
笑落日澹澹青山佞

湧金亭示同游諸君

太行元氣老不老上與左界分山河有如巨鼇昂  
頭西入海突兀已過餘坡陀我從汾晉來山之面  
目腹背皆經過濟源盤谷非不佳煙景獨覺蘇門  
多湧金亭下百泉水海眼萬古畱山阿觴沸樂水  
源滄淪晉溪波雲雷涵鬼物窟宅深蛟鼉水妃簸

弄明月幾地藏發泄天不訶平湖油油碧於酒雲  
錦十里翻風荷我來適與風雨會世界三日漫兜  
羅山行不得山北望空長哦今朝一掃衆峯出千  
鬟萬髻高峩峩空青斷石壁微茫散煙蘿山陽十  
月未搖落翠蕤雲旂相盪摩雲煙故爲出濃淡魚  
鳥似欲畱婆娑石間仙人迹石爛迹不磨仙人去  
不返六龍忽蹉跎江山如此不一醉拊掌笑煞孫  
公和長安城頭烏尾訛并州少年夜枕戈舉杯爲  
問謝安石蒼生今亦如卿何元子樂矣君其歌



南冠行

癸巳秋爲曹得一作

南冠纍纍渡河關畢逋頭白乃得還  
荒城雨多秋氣重頽垣敗屋深  
茅菅漫漫長夜浩歌起清涕曉  
枕畱餘潛曹侯少年出紈綺高門大屋  
垂楊裏諸房三十侍中郎獨守殘編北窗底  
王孫上客生光輝竹花不實鷓鴣飢  
絲桐切切解人語海雲喚得青鸞飛  
梁園三月花如霧臨錦芳華朝復暮阿京  
風調阿欽才暈碧裁紅須小杜長安張敞號  
眉嫵吳中周郎知曲悞香生春動一詩成  
瑞露靈芝滿

窗戶魚龍吹浪三山沒萬里西風入華髮  
無人重典鷓鴣裘展轉空牀臥秋月寶鏡埋寒灰  
鬱鬱萬古不可開龍劍出地底青天白日驅雲雷  
層冰千里不可畱離魂楚些招歸來生不願朝入省  
暮入臺願與竹林嵇阮同舉杯郎食猩猩唇妾食鯉魚  
尾不如孟光案頭一盃水黃河之水天上流何物  
可煮人間愁撐霆裂月不稱意更與倒翻鸚鵡洲  
安得酒船三萬斛與君轟醉太湖秋

醉後走筆



建茶三盃水雪香離騷九歌日月光腰金更騎揚  
州鶴雋永不羨太官羊短燈檠子移近床秋風吹  
簾月轉廊一歌再歌魂魄動入眼渺渺橫沅湘湘  
妃漸遠望不及金支翠蕤澹飛颺漁父話獨醒孺  
子歌滄浪山鬼獨一脚拊掌笑我旁湘纍歸來弔  
故國遺臺老樹山蒼蒼掩書一太息夜如何其夜  
未央東家女兒繡羅裳銀瓶瀉酒勸客嘗一酌均  
跖顏再酌齊彭殤宇宙不今古氣節無陰陽少年  
避酒不肯喫跬步乃有無何鄉愛茶愛書死不徹

乃以冰炭貯我腸世間唯有麴生風味不可忘

南湖先生雪景乘驟圖

并序

南湖先生原武人年二十許時曾以鄉試  
兩魁鄭州然其資倜儻所以自望者甚高  
終不樂爲舉子計卽棄去學擊刺當正隆  
征南頗欲馳逐戎行間旣而大定詔書下  
兵各罷歸先生抱利器而無所試乃浮湛  
里社以詩酒自娛買田南湖之上築亭種  
樹徜徉于其間盡置家事日與賓客酣飲



歌管棊梨窳日夕不少休家故饒財又好  
施予其赴人之急猶疾痛之在已故人尤  
以此歸之所與游如臨洛王逸賓游宗之  
大定劉之昂其人皆天下名士至論人物  
必曰靖達卿今日之奇男子也先生生於  
天會初歷大定明昌泰和優游於太平和  
樂之世者五十年太安兵興乃下世平生  
喜作詩樂府尤有蘊藉觀西子棄瓢詩可

見也

髻鬟蕭蕭蕪苧蘿秋千古香溪水自流  
吳越兵爭竟何得風流輸與五湖舟

嘗雪中騎青驪行京水道中作長詩卒章  
有安得西都畫史吮筆出新意寫作南湖  
老子雪景乘騾圖之句其子文煒北渡後  
來東平始以先生之意追畫此圖求僕賦  
詩文煒質直好義讀書作文有聲時輩中  
觀其子可以想見先生之爲人故爲道其  
事并以致懷賢之思

大河茫茫白連空寒雲迢迢度南鴻汴梁高樓管  
絃裏戍臯行人西北風北風吹雪來飄瞥捲孤蓬



異色變慘澹元氣開洪濛襄陽潮陽詩境在掇拾  
物色真難工青驪誰此游望見知是南湖翁南湖  
翁少日骯髒今龍鍾猶能吐氣萬丈如長虹閉門  
兀坐意不愜夢看銀海翻魚龍寶花世界瓊瑤宮  
江山隨翁入清雄詩成仰天一大笑飛花落絮春  
濛濛鬱鬱梁宋郊翁家出強宗許與必豪右收土  
入等侯封翁年十八九弄筆學雕蟲叠取兩解魁  
隱隱何隆隆一旦拂衣去學劍事猿公正隆適南  
征疋馬走從戎墨丸磨楯鼻意與江流東紫微出

東方淮海亦來同都將書與劔田間就春農仕宦  
不作邴曼容醉鄉自愛王無功鷓鴣從渠致鍾鼓  
野鶴豈合棲樊籠南湖煙景多魚鳥亦從容亦有  
兩小船綸竿插船篷高亭出秀樾窗戶連青紅清  
颺隨騶輿暝色赴吟筇門前車馬來日釀日不供  
但苦佳客少焉知清興終看翁棄瓢詩調戲鴟夷  
老子如兒童雄吞已覺雲夢小寒縮寧作書生窮  
當年我得奉談笑晝夜肯放清樽空東家西家不  
相從南海北海不相逢風流耆舊今誰似惆悵相



看是畫中



遺山先生詩集卷第六 終









